

## 10

**Zakat dan Hikmahnya**

الْحَمْدُ لِلَّهِ رَبِّ الْعَالَمِينَ وَالْعَاقِبَةُ لِلْمُتَّقِينَ وَلَا عُدْوَانَ إِلَّا عَلَى الظَّالِمِينَ،  
 أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ شَهَادَةٌ تُنَجِّي قَائِلَهَا مِنْ  
 عَذَابِ النَّارِ وَأَشْهَدُ أَنَّ سَيِّدَنَا وَنَبِيَّنَا مُحَمَّدًا عَبْدُهُ وَرَسُولُهُ، اللَّهُمَّ صَلِّ  
 وَسَلِّمْ وَبَارِكْ عَلَى سَيِّدِنَا مُحَمَّدٍ وَعَلَى آلِهِ وَأَصْحَابِهِ وَالتَّابِعِينَ لَهُمْ بِإِحْسَانٍ  
 إِلَى يَوْمِ الدِّينِ.

أَمَّا بَعْدُ، فَيَا أَيُّهَا الْمُؤْمِنُونَ أَوْصِيكُمْ وَإِيَّايَ بِتَقْوَى اللَّهِ فَقَدْ فَازَ الْمُتَّقُونَ.  
 وَاتَّقُوا اللَّهَ وَاعْلَمُوا أَنَّ اللَّهَ مَعَ الْمُتَّقِينَ.

**Kaum Muslimin Yang Dirahmati Allah...**

Terlebih dahulu saya berwasiat kepada diri saya dan kaum muslimin sekalian agar bertakwa kepada Allah dengan sebenar-benar takwa sesuai dengan firman Allah s.w.t:

أَعُوذُ بِاللَّهِ مِنَ الشَّيْطَانِ الرَّجِيمِ  
يَا أَيُّهَا الَّذِينَ ءَامَنُوا اتَّقُوا اللَّهَ حَقَّ تُقَاتِهِ وَلَا تَمُوتُنَّ إِلَّا وَأَنتُمْ  
مُسْلِمُونَ ﴿١٠٢﴾

Maksudnya: “Wahai orang-orang yang beriman bertakwalah kamu kepada Allah dengan sebenar-benar takwa dan janganlah kamu mati melainkan kamu dalam keadaan beragama Islam.”

( QS Ali-Imran (3):102 )

### Hadirin Kaum Muslimin Sekalian...

Dalam kesempatan kali ini, khatib ingin menyampaikan khutbah bertajuk “**ZAKAT DAN HIKMAHNYA.**”

Jika kita renung serta bandingkan negara-negara di dunia ini, negara Islam adalah negara yang kaya raya dengan hasil galian dan sumber asli dimana penghasilannya mencecah berbilion ringgit setiap hari. Dengan nikmat yang sedemikian mewajarkan umat Islam bersyukur dan melipatgandakan usaha serta amal soleh.

Allah berfirman:

أَعُوذُ بِاللَّهِ مِنَ الشَّيْطَانِ الرَّجِيمِ  
وَإِذْ تَأَذَّنَ رَبُّكُمْ لَئِن شَكَرْتُمْ لَأَزِيدَنَّكُمْ وَلَئِن  
كَفَرْتُمْ إِنَّ عَذَابِي لَشَدِيدٌ ﴿٧﴾

Maksudnya: “Dan (ingatlah) ketika Tuhan kamu memberitahu: “Demi sesungguhnya! jika kamu bersyukur nescaya Aku akan

*tambahi nikmat-Ku kepada kamu, dan demi sesungguhnya! Jika kamu kufur ingkar sesungguhnya azab-Ku amatlah keras.”*

( QS Ibrahim (14):7 )

Salah satu cara menterjemah kesyukuran kita terhadap nikmat yang Allah kurniakan ialah dengan menunaikan ibadah zakat yang difardhukan kepada kita seperti yang disenaraipendekkan sebagai salah satu daripada lima rukun Islam. Rasulullah s.a.w bersabda:

بُنِيَ الْإِسْلَامُ عَلَى خَمْسٍ :

شَهَادَةٌ أَنْ لَا إِلَهَ إِلَّا اللَّهُ وَأَنَّ مُحَمَّدًا عَبْدُهُ وَرَسُولُهُ ، وَإِقَامِ الصَّلَاةِ ،  
وَإِيتَاءِ الزَّكَاةِ ، وَصَوْمِ رَمَضَانَ ، وَحَجِّ الْبَيْتِ لِمَنْ اسْتَطَاعَ إِلَيْهِ سَبِيلًا .

Maksudnya: “Dibina Islam itu atas lima tunggak; Pengakuan tidak ada Tuhan selain Allah dan Nabi Muhammad s.a.w. itu hamba dan rasul-Nya, dan mendirikan sembahyang fardhu 5 kali sehari semalam, dan mengeluarkan zakat (harta dan fitrah), dan berpuasa dalam bulan Ramadan dan mengerjakan haji di Baitullah bagi orang yang mampu.”

( HR Bukhari dan Muslim )

### **Sidang Jumaat Yang Sama-Sama Berbahagia...**

Tujuan Allah memerintahkan kita menunaikan zakat adalah untuk membersihkan harta. Sejalan dengan makna kalimah zakat dari segi bahasa iaitu *bersih* dan *suci*.

Pengertian “bersih” dan “suci”, membawa makna membersihkan harta, diri dan jiwa nurani pembayar zakat daripada kekotoran

dan dosa di samping mengikis sifat kedekut dan bakhil yang bersarang di hati kita. Firman Allah s.w.t:

أَعُوذُ بِاللَّهِ مِنَ الشَّيْطَانِ الرَّجِيمِ  
 خُذْ مِنْ أَمْوَالِهِمْ صَدَقَةً تُطَهِّرُهُمْ وَتُزَكِّيهِمْ بِهَا وَصَلِّ عَلَيْهِمْ  
 إِنَّ صَلَاتَكَ سَكَنٌ لَهُمْ وَاللَّهُ سَمِيعٌ عَلِيمٌ ﴿١٠٣﴾

Maksudnya: “Ambilah (sebahagian) dari harta mereka menjadi sedekah (zakat), supaya dengannya Engkau membersihkan mereka (dari dosa) dan mensucikan mereka (dari akhlak yang buruk); dan doakanlah untuk mereka, kerana sesungguhnya doamu itu menjadi ketenteraman bagi mereka, dan (ingatlah) Allah Maha Mendengar, Lagi Maha mengetahui.”

( QS al-Taubah(9):103 )

Sabda Rasulullah s.a.w:

مَنْ آدَى زَكَاةَ مَالِهِ فَقَدْ ذَهَبَ عَنْهُ شَرُّهُ

Maksudnya: “.....Barangsiapa menunaikan zakat hartanya, maka telah pergi sebarang keburukan dari hartanya.”

( HR Tabrani, Ibnu Khuzaimah dan Hakim )

Dari segi istilah syarak pula, zakat membawa maksud “Nama bagi sebahagian dari harta benda yang dikeluarkan atas perintah Allah s.w.t kepada amil yang ditauliahkan sebagai sedekah wajib untuk diagihkan kepada mereka yang telah ditetapkan menurut syarat-syarat yang telah ditentukan oleh syarak.”

Sehubungan dengan itu, Islam yang merupakan agama sejagat yang amat mementingkan hubungan manusia sesama mereka, telah memperkenalkan institusi amil dalam pelaksanaan ibadah zakat sebagai perantara antara golongan pemberi dengan penerima demi menjaga dan memelihara keharmonian serta mengelak wujudnya perbezaan darjat dalam sesebuah masyarakat agar penerima zakat khususnya fakir dan miskin tidak berasa kerdil dan hina.

### **Kaum Muslimin Yang Dirahmati Allah...**

Selain itu, hikmah disebalik kewajipan berzakat dapat memupuk semangat saling sayang-menyayangi, bantu-membantu dan mengilap perasaan tolak ansur dimana golongan kaya tidak mementingkan diri sendiri, bahkan memikirkan kesengsaraan yang dideritai oleh orang lain.

Ibadah zakat juga merupakan tanda aras kesempurnaan Islam bagi setiap individu muslim yang telah cukup syarat wajibnya. Ianya dapat kita perhatikan dalam sebuah hadis:

رَوَى عَنْ عَلْقَمَةَ أَنَّهُمْ اتَّوَأَ رَسُولَ اللَّهِ صَلَّى اللَّهُ عَلَيْهِ وَسَلَّمَ قَالَ :  
 قَالَ لَنَا النَّبِيُّ صَلَّى اللَّهُ عَلَيْهِ وَسَلَّمَ إِنَّ تَمَامَ إِسْلَامِكُمْ أَنْ تُؤَدُّوا زَكَاةَ  
 أَمْوَالِكُمْ

Maksudnya: *Diriwayatkan daripada Alqamah r.a, dia berkata ketika serombongan mereka mengunjungi Rasulullah s.a.w, bahawa berkata Rasulullah s.a.w kepada kami: "Sesungguhnya kesempurnaan Islam kamu dengan menunaikan zakat harta-harta kamu."*

( HR Alqamah )

### **Kaum Muslimin Sekalian...**

Terdapat dalam sebuah hadis yang menceritakan keadaan dimana golongan yang enggan membayar zakat, maka harta yang mereka kumpulkan itu akan dibakar dan kemudiannya digosokkan di atas belakang, dahi serta rusuk mereka sambil harta benda itu berkata:

*“Inilah hartamu yang kau kumpulkan semasa di dunia.”*

Di dalam hadis yang lain pula, ada mengisahkan mengenai mereka yang tidak menunaikan zakat ternakan, maka haiwan-haiwan itu akan datang kepada mereka di hari kiamat sambil memijak-mijak dan menanduk-nanduk dengan tanduk mereka yang tajam lantas berkata *“inilah hartamu yang kau tidak keluarkan zakat daripadanya.”*

أَعُوذُ بِاللَّهِ مِنَ الشَّيْطَانِ الرَّجِيمِ  
 وَأَقِيمُوا الصَّلَاةَ وَآتُوا الزَّكَاةَ وَارْكَعُوا مَعَ الرَّاكِعِينَ ﴿٤٣﴾

Maksudnya: *“Dan dirikanlah kamu akan sembahyang dan keluarkanlah zakat, dan rukuklah kamu semua (berjemaah) bersama-sama orang-orang yang rukuk.”*

( QS al-Baqarah (2):43 )

بَارَكَ اللَّهُ لِي وَلَكُمْ بِالْقُرْآنِ الْعَظِيمِ، وَنَفَعَنِي وَإِيَّاكُمْ بِمَا فِيهِ مِنَ  
الْآيَاتِ وَالذِّكْرِ الْحَكِيمِ، وَتَقَبَّلَ مِنِّي وَمِنْكُمْ تِلَاوَتَهُ إِنَّهُ هُوَ السَّمِيعُ  
الْعَلِيمُ، أَقُولُ قَوْلِي هَذَا وَأَسْتَغْفِرُ اللَّهَ الْعَظِيمَ لِي وَلَكُمْ، وَلِسَائِرِ  
الْمُسْلِمِينَ وَالْمُسْلِمَاتِ، وَالْمُؤْمِنِينَ وَالْمُؤْمِنَاتِ، فَاسْتَغْفِرُوهُ فَيَا  
فَوْزَ الْمُسْتَغْفِرِينَ وَيَا نَجَاةَ التَّائِبِينَ.